

5. Korrika. Korrika Txiki-handia

Korrikaren 5. edizioa 1987ko apirilaren 3an hasi zen Hendaian, eta, 2.085 km egin ostean, apirilaren 12an amaitu zen Bilbon, "Euskara, zeurea" lelopean. Omendua Balendin Enbeita bertsolari eta idazlea izan zen. Oskorriren erritmoaren pean alaitu zen Korrikaren edizio hura. Mezuaren egilea Jon Enbeita izan zen.

Aurreko atalean, galdera bat egin nizuen: "1. kilometroan, Hendaiatik atera behar zutenean, zer eguraldi izan zuten?" A erantzun bazenuten (...) hori erantzun okerra da, uholdeak 1983an izan zirelako; B erantzun bazenuten (...) hori ere erantzun okerra da, elurte-arazoak 1985ean izan zirelako; azkenik, C erantzun bazenuten (...) oso ondo! Izugarritzko kazkabar-jasa egin zuen-eta.

Euskal Herrian bizitzeak alde txar bat dauka: eguraldiarekin ez asmatzea, alegia. Euskal Herri tropikalean bizi gara, badakizue: (...) "Batuetan hotz, bestetan bero, eguraldi ezberdina egiten du egunero". Horrelako zerbait gertatu zitzaion Xalbador ikastolako ikasle bati; berak eman zion hasiera lasterketari, baina ez zuen eguraldia aldeko izan. Lehen kilometroa kazkabarra gogotik ari zuela egin zuen. Hori da hori kemena! Bide batez, merezi du aipatzea Xalbador ikastetxea proiektu garrantzitsu bilakatzeaz zegoela Seaskarentzat: egitasmoak bermatu nahi zuen Ipar Euskal Herriko haurrek euskaraz egin ahal izango zituztela lizeora joan arteko ikasketak.

Haurrak hasieratik izan ditu lagun Korrikak. Ordutegiak eta irakasleak hala utziz gero, beraiek beti prest parte hartzeko. Hala ere, zenbaitetan Korrika gauez pasatzen da haien bizitokitik; horregatik, 5. Korrikatik aurrera, gero eta ohikoago bihurtu zen Korrika Txikiak ikustea. Bosgarren edizioan, adibidez, herri gehienetako kroniketan agertzen da Korrika Txikiaren aipamena bat. Bilboko haurrek, esaterako, milaka bildu ziren eta festa handia egin zuten.

Arguedasen, heavyek zigarroa ahoan eta bizi-bizi osatu zuten kilometroa. Bertaratu zirenek ikusi zuten Oskorriren pieza abestuz joan zirela. "Piskerra" musika taldeko kide baten arabera, "Gure herrian gazteok euskararekin eta euskal mamia duen guztiarekin gaude, euskal herritarrek garelako". Zalantzarik gabe, euskaldunon profila mota guztietakoa zen orduan, eta gaur egun ere bada.

Gauzak horrela, nolako erritmoa edukiko zuen Oskorriren abesti ospetsuak? Bada, saioa kanta harekin amaituko dugu, eta, beti bezala, txintxoak izan. Agur, eta ondo izan!